

քական ընաւորութիւն: Այսուհետեւ բացառապէս հայ Ժողովրդից էր կախած պատերազմի վախճանը: Անդրկովկասեան իշխանութիւնը ո՛չ միայն չէր նպաստում պատերազմին, այլ և իր վարանոտ ու հակասական քայլերով ու ներքին հակամարտութիւններով աւելի ևս թուլացնում էր ճակատի պաշտօտականութեան դործը: Թիֆլիսում տիրող բարքերն ու միջցեղային բախումները, մանաւանդ, սաստիկ ազդում էին բանակի կազմութեան ու տրամադրութեան վրա: Հայերը՝ Թիֆլիսում ու դաւառներում պահանջում էին յայտարարել նոր զօրակոչ, մինչ Անդրկ. Կոմիսարիատը, մահմետական անդամների ճնշման տակ և վրացիների յեղեղով դիրքի պատճառով, ձգձգում էր: Բանը հասաւ այնտեղ, որ հայկական շրջանների մի քանի ազգային խորհուրդներ ստիպւած եղան յայտարարել տեղական զօրահաւաք, որ ահադին իրարանցում ու դժգոհութիւն առաջ բերեց Թիֆլիսում: Եւ միայն հայերի ստիպումով, անվերջ ու ջղայնացնող յետաձգումներից և երկու ամիս ղինւորական յանձնախմբում պահելուց յետոյ, շատ ուշ, մարտ 24-ին Սէյմը ընդունեց զօրահաւաքի օրինադրիծը, որով ղինւորական նախարարութեան իրաւունք էր տրուում դէնքի տակ առնել, առաջին հերթին, մինչև 28 տարեկան ղինապարտները, իսկ յետոյ, ի հարկին, նաև մինչև 32 տարեկանները:

Մարտ 2-ին հայկական Կորպուսի հրամանատար զօր. Նազարբէգեանը նշանակեց ճակատի հրամանատար՝ Օլթիից մինչև Մակու ընկած տարածութեան վրա: Օլթի-Բաթում գիծը պէտք է պաշտպանէին վրացիները: Հայ և վրացական ճակատների հրամանատարութիւնը կենտրոնացւեց զօր. Լեբեգինսկիի ձեռքը:

Զօր. Նազարբէգեանի տրամադրութեան տակ կար, միջին հաշուով, 36 գումարտակ զօրք, թերի կազմերով — մօտ 15,000 ղինւոր, որով պէտք է գրաւէր աւելի քան 250 կիլոմետր երկարութիւն ունեցող ռազմաճակատ և պահպանէր թիկունքը:

Հայկական ճակատի դէմ, համաձայն հետախուզական տեղեկութիւնների, գործում էին հետեւեալ թիւրքական ուժերը. 5րդ, 11րդ և 36րդ դիվիզիաները իրգրում-Սարըղամիշ շրջանում, 1 դիվիզիա Ալաշկերտում և 1 դիվիզիա Վանի լճի շուրջը: Թէ թուով և թէ, մանաւանդ, կազմակերպութեամբ ու ներքին կորովի տեսակէտից թիւրք բանակը աւելի բարձր էր, քան հայկականը:

Բայց և այնպէս, հայերը ցոյց տւին ուժեղ դիմադրութիւն: Կարաուր-գանից այս կողմ թիւրքերը իւրաքանչիւր թիզ հողը գրաւում էին կռուով և զոհեր տալով:

Ընդհարումները սկսեցին մարտի առաջին կէսերին՝ Կարա-Ուրգանի շրջանից: Թիւրքական գործողութիւնների հետ մէկտեղ գլուխ բարձրացրին և քրդերը թիկունքում, մանաւանդ երկաթուղու շրջանում: Մարտ 10-ին, թիւրքերի ճնշող դրոհի տակ՝ հայ զօրքերը քաշեցին դէպի Սան-Դերէ: Մարտ 20-ին թիւրքերը, մօտ 6 գումարտակով, լայն տարածութեամբ, շարժւեցին դէպի Կարաքուրտ, Բարդուս և այս կէտերը գրաւելուց յետոյ,